

四庫全書

集部

欽定四庫全書

梅溪前集卷六

宋 王十朋 撰

詩

癸酉三月二十五日至剡溪旅舍觀曹夢良題
壁有撩我思家第一篇之句僕離家半月亦未
嘗作詩因次其韻

客舍那堪聞杜鵑夢魂驚斷竟無眠定知此境撩鄉思

我亦曾非第二篇

剡之市人以崇奉東嶽為名設盜跖以戲先聖
所不忍觀因書一絕

里巷無端戲大儒恨無司馬為行誅不知陳蔡當時厄
還似如今嵯縣無

周德遠植瑞香於窓前戲成一絕

主人貪睡為貪香花植窓前意味長見說有時魂夢裏
化為蝴蝶遶花旁

游明心院

精舍傍脩巖道心隨眼明泉餘偃公迹

偃公泉

山接剡溪

城無雨竹亦淨有風松更清誰名上方閣撩我欲歸情

歸鴻
聞

游圓超院登挾溪亭次盧公

天驥

韻

路入剡山腰風生玉川腋孤亭物外高雙溪眼中碧山
僧作亭知幾春賞音端怕逢詩人自從妙語發丘壑遂
使絕境多蹄輪我來首訪維摩詰問訊雙溪自何出發

源應與婺溪同賦物慙無沈郎筆凭欄欲洗名利塵入
眼翻驚客恨新山城重重水如帶可能挽住思鄉人

寄夢齡昌齡弟

老去生涯集百憂一身萍泛剡溪頭釣魚溫水同侯喜
旅食新豐類馬周長缺有時思海味短檠終夜照離愁
也知四海皆兄弟能似天生羽翼不

高和叔生日

高標綽有魯王風天為勲門慶誕公揮麈笑談傾坐上

傳家韜畧蘊胸中暫從剡水高人隱行繼澶淵蓋世功
長願紅顏似今日壽尊鯨吸百川空

天子始締

盛德方居火天王始服締薰風生殿早畏日到官遲瑩
雪羅初疊含風葛乍披汗寧濡玉體暑不近天肌表飾
遵尼父恩榮被拾遺中官同儉德無媿葛覃詩

淵源堂十二詩

淵源堂

像貌崇賢聖名言訓子孫日親師與友力學探淵源

細論堂

不飲紅裙酒祇將文字論江東渭北客日日對芳尊

宜桂軒

主人端不俗景物亦相宜手種軒前桂聯芳共幾枝

蘊秀軒

剡溪蘊秀異久懌少陵詩今向軒前看人如晉宋時

同襟館

安道家何處溪山深更深扁舟不憚遠得得訪同襟

富學齋

金玉本非富詩書元不貧平生無盡用學問在吾身

輝聲齋

功名就烜赫遺訓可能忘待獻明光賦蜚聲滿四方

集彥齋

獨學恐孤陋要須親友朋虛齋集羣彥共對短燈檠

擢秀齋

好似東山謝滿庭芝與蘭義方能不倦擢秀固非難

恢義齋

憶昔杜陵老恨無千萬間君能恢大義吾黨悉歡顏

蘭馨室

一室雖方大游從必舜徒芬馨不自覺身化與之俱

足鯉池

堂上論文客異時還索居池中鯉魚足好寄別來書

書院雜詠

牡丹

今古幾池館人人栽牡丹主翁兼種德要與子孫看

芍藥

已過花王候纔聞近侍香來遊禁酒地免作退之狂

岩桂

岩桂何時種遙聞月窟香君家似燕賓會見五枝芳

江梅

園林盡搖落冰雪獨相宜預報春消息花中第一枝

酴醾

日烘香倍遠雨浥韻尤清誰把玉錢比恐花羞此名

紅梅

桃李莫相妬天姿元不同猶餘雪霜態未肯十分紅

海棠

欲與春爭媚嫣然一笑芳雨中如有恨疑是為無香

瑞香

曾入江南夢故宜名瑞香何人好談論雅目誤更張

菊花

不恨開時晚自知能傲霜
慎毋同瑣細采擷上君堂

榴花

客館逢重午石榴花正芳
吾廬開亦好歸去嚼天漿

蠟梅

非蠟復非梅梅將蠟染腮
游蜂見還訝疑是蜜中來

簷蔔

禪友何時到遠從毘舍園
妙香通鼻觀應悟佛根源

千葉黃梅

菊以黃為正梅惟白最佳徒勞染千葉不似雪中花

千葉紅桃

在處飄紅雨臨窓照夕陽何時清禁裏一笑伴仙郎

千葉白桃

豈有天桃艷淡然羣卉中全身是清白那肯媚春風

佛見笑

學得醅醪白更能相繼芳金仙粲然笑鼻觀不多香

荷花

十里西湖上紅雲照綠波何如吾淨友臭味不須多

蓼花

秋色在何許蓼花含淺紅客情禁不得歸興逐西風

萱花

有客看萱草終身悔遠游向人空自綠無復解忘憂

斑竹

蒼梧巡不返斑竹至今存今日稽山下幾枝忠孝痕

燕竹

問訊東牆竹佳名今始知龍孫初迸日燕子却來時

西河柳

瀟灑西河種誰移向浙東青枝太纖細莫近楚王宮

葡萄

珠帳臨簷掛龍鬚滿架抽也知堪釀酒不要博涼州

芭蕉

草木一般雨芭蕉聲獨多主人栽未足其奈客愁何

石菖蒲

天上玉衡散結根泉石間要須生九節長為駐紅顏

慎芳草

禁殿安蛩尾騷人逐畢方何如栽此草有火自能妨

盆中新荷

首夏盤池裏新荷點數圓主人行中選故為作青錢

假山

君有好山僻疊山亭院間不遮山外眼又得見真山

盆池

不比兒童戲埋盆作小池要令盆底水長滿不傾欹

書架

君富端不俗有錢長買書家藏三萬軸不怕腹空虚

鶴

雅志在冲霄長思振羽毛風前忽相和聲徹九天高

鵝

善鳴聊自適不願遇知音深恐山陰姬誤猜君子心

花鴨

毛羽不多異浪於花得名深疑杜陵誤黑白未分明

鷓鴣

文采真為累飛鳴不自由小池新水漲相對謾沉浮

剡溪雜詠

剡溪

千古剡溪水無窮名利舟閒乘雪中興惟有一王猷

了溪

禹迹始壺口禹功終了溪餘糧散幽谷歸去錫玄圭

挾溪亭

遠水從台婺同歸古嵯州巍亭壓山頂千古挾雙流

龍宮碑

曾到龍宮寺拂塵觀古碑何時無短李肉眼可能知

戴顓墓

曠野冢累累子孫猶不知千年戴顓墓三字道旁碑

阮仙翁宅

再入山中去烟霞鎖翠微故鄉遺宅在何日更來歸

戴溪亭

剡水照人碧剡山隨眼青我來非雪興慙上戴溪亭

偃公泉

泉自何時有得名從偃公誰能繼張陸為載水經中

書院掛額展筵雅會也戲集諸堂軒齋名

作詩

黌館名初掛銀鈎勢欲翻人才蘊秀異學業扣淵源俊

彥方羣集文章可細論輝聲邁前輩擢秀藹諸孫心友
居蘭室天香滿桂軒茲為學者富難與俗流言恢義高
風倡同襟舊好敦池中神鯉足一一上龍門

別周德遠諸友

山城過踈雨客館生新秋鄉心雜病思浩蕩不可留憶
昨初來時園花弄春柔俯仰節物變木杪風颼颼旅食
百日餘故人情已周論文有深味惜別添牢愁捫花物
色老琴書散交游暖律回南枝相期泛仙舟

宿石佛

七月二十三日回自剡中宿石佛摩雲閣時與謝圖
南童文卿沈齊卿黃庭甫子楊同行周德遠德貽德
廣陳少曾史岩起携且餞別

脩徑入幽壑梵宮摩碧霄仰頭驚突兀跬步怯峒崑
相石間湧鍾聲雲外飄明朝路南北身世各塵囂

白若遇水以小舟從石門渡勢危甚因書數語
示圖南文卿時八月二日也

歸途阻秋潦溪漲不可涉迂從石門渡未見心已怯壯
哉龍伯宮幽據鴈山脇岩如峙城壁南北本相接衆流
欲朝宗天為開岌業泓澄潭百尺艤晚舟一葉吾生何
自輕內顧無可挾所賴二友生千里同負笈忠信儻可
仗免作飛鷲跼來歸從剡溪山水頗涉獵石齧天台舟
浪拍臨海楫可曾如此境令我魂震懾連年作行客川
塗但取捷不因風雨暴誰暇遠步屨茲渡雖云惡觀覽
意亦愜謾賦石門篇添入剡游篋

孟甲生日

記汝初生際燈花達旦然門闌增喜慶翁嫗最矜憐已
過周天歲行臨志學年勉修愚魯質詩禮稱家傳

孟甲孟乙好蓄古錢因示以詩

世人多好錢今汝獨好古書中閱平準壁上按圖譜廣
拾漢五銖遠及周九府惜哉生我家此物罕曾覩百中
時得一喜笑見眉宇所蓄雖不多其志頗可取閭閻富
家子繞牀堆阿堵一字不識丁碌碌何足數更宜移此

力典墳讀三五縱未到聖賢定可過乃父

周光宗贈蠣房報以溪蓴

珠嶼蠣房魁海錯左原蓴線冠溪毛韓公南食可曾見
張翰東歸徒自高鼎俎珍庖輸肉食江湖佳味屬吾曹
有無相易通家事僮僕往來毋憚勞

劉府君挽詞

全之父

歆向詵然萃一門過庭詩禮盡公恩竒兒不負義方教
舊治至今遺愛存心境欲明憑貝葉壽藏預卜傍祇園

髯郎行燭青藜杖定見榮光達九泉

賤子無天釁早鍾記觀先友涕亡從士林方喜榮三桂
丞舍俄驚慘二松剡水淒涼回棹速丹丘慟哭過車凶
發揚門戶勝他族深羨公家有蔡邕

賈府君挽詞

予妻父

鹿岩重見鹿門翁襟宇渾然太古風負郭良田全種德
起家難弟已收功花間麟冢經年就木杪龜趺指日豐
門婿自慚非李漢鄙文何足狀韓公

陳夫人挽詞

予妻母

偉節聲名蓋一時夫人淑德最相宜便甘布素從高隱
不惜花鈿拯衆飢萱草未乾堂下土楊花已應夢中詩

如今多少王孫餓進食哀憐復有誰

賈公夢中嘗得詩云洞房人不見相

望摘
楊花

納涼偶成

架松却煩暑梳竹來清風
頑然七尺軀寄此微涼中
高枕傲有道深杯醉無功
山林有餘樂此興誰吾同

悼演述二老僧

疊石峯前二老僧相逢一笑見真情
社中對酒日初永林下圍碁秋始清
尚擬維摩眠丈室遽驚圓澤厭浮生
通幽亭冷西樓古過客傷心涕淚橫

黃楊

黃楊紀孝義也家有黃楊根一榦百枝
葉森然木之有義者也故作是詩以記之

嘉彼黃楊鬱焉其蒼匪甕而圓匪蓋而張
百榦同根森

如弟昆千枝其子萬葉其孫惟此黃楊先子所植草木
有義先子之德願言我家兄弟子孫如此嘉樹永為義
門



梅溪前集卷六

欽定四庫全書

集部

梅溪前集卷

七至九

詳校官庶吉士臣翁樹培

主事臣呂雲棟覆勘

總校官進士臣朱鈐

校對官中書臣宋枋遠

謄錄監生臣王宮

欽定四庫全書

梅溪前集卷七

宋 王十朋 撰

詩

林下十二子詩並序

梅溪野人既見黜於春官齒髮老矣悟虛名之可厭
知林泉之足樂也家之東南隅有井焉泉清而味甘
井畔有脩竹數百挺闢小徑以通幽有梅數根歌卧乎

竹間兩柱蒼然夾井而植因蒔蘭於竹林之下植昌陽
於井旁以增野趣予與賓友杖屨徜徉賦詩飲酒奕碁
於其間頗足自適遂命曰林下七子且字竹曰子脩井
曰子深梅曰子先桂曰子蒼蘭曰子芳昌陽曰子仙
梅溪野人為主故自字曰子野仍賦七詩以寓意
牡丹芍藥花中之富貴者桃李艷而繁凡紅艷之屬
俱非林下客也皆不取予既醉而卧夢有五人來謁自
稱黃公丁公柳先生三徑居士三槐公子予延之坐黃

公乃前曰聞主人有林下之游與六子為友褒之以名
字寵之以詩章亦一時之雅致也某雖不才然封植於
君家久矣獨不與茲選何耶予曰予非敢忘公也然所
取者皆井竹間諸友公所居差遠予與客遊林下而公
不在眼故不與焉爾黃公艷然曰主人欲隔離牆分爾
汝耶予媿其言許以嘉客處之丁公踵進曰主人昔有
幽居三詠某與黃公竹生與焉今竹生首與林下選黃
公亦辱千金之諾矣主人苟未忘壁上語願以某處坐

客之未可乎言未畢柳先生三人俱進皆有請焉予悉
領之既覺而思此必吾家黃楊丁香槐柳菊也予不可
食夢中言遂字黃楊曰子嘉丁香曰子素柳曰子春
槐曰子夏菊曰子秀復賦五詩以贈之通前凡十二子
焉時甲戌孟夏也

竹子脩

萬木蕭疎怯歲寒子脩相見喜平安世間寧有揚州鶴
休訝平生肉食難

井子深

度量泓泓井子深客來車轄總能沈定須再築新亭覆

不負先君好事心

先人昔嘗以亭覆井目曰投轄

梅子先

竹外溪頭手自栽羣芳推讓子先開好將正味調金鼎

莫似櫻桃太不才

桂子蒼

學仙深愧似吳郎賴有吾廬兩子蒼疑是廣寒宮裏種

一秋三度送天香

蘭子芳

國香入鼻忽揚揚知是光風泛子芳
林下自全幽靜操縱無人採亦何傷

昌陽子仙

天上星郎字子仙結根拳石傍清泉
旒苓方入醫師手誰識仙姿解引年

黃子嘉

保綠軒前黃子嘉非松非柏亦非花故應喚作思人樹
數十年前閱我家

丁子素

雨底含愁雪裏芳琉璃葉映小何郎世人競重熏籠錦
子素何曾怯瑞香

柳子春

夾道青青柳子春自從栽植幾番新如今已作參天樹
應笑衰遲老主人

槐子夏

方苦炎炎畏日長
欣蒙子夏惠清涼
三槐雅是王家物
為榜新亭擬舊堂

菊子秀

子秀霜中色更佳
金錢粲粲滿庭堦
淵明異日開三徑
端仗茲花慰老懷

王子野

場屋虛名且罷休
歸來聊效晉人游
林間諸子總非俗

肯與野人為友不

昌齡闢圃植花索詩於老者戲作數語兼簡夢

齡

東園小小花木稀西園廓廓規模奇西園主人但置酒
東園老人甘賦詩朝游西園飲千斛莫向東園吟百幅
更約南園好事人酒盞詩篇日相續

西園新闢昌齡索詩予以其未開尊也戲作數
語既飲復用前韻

阿連好事由來稀
開軒闢圃幽更奇
峰巒羅列富遐覽
氣象收拾歸新詩
百挺琅玕花數斛
宛似輞川圖一幅
朝莫過從有弟兄
長願歌聲無斷續

予與二弟連日賦詩飲酒詩成命二子書之亦
居家之一樂也復用前韻

不愁地僻車馬稀
自喜兄弟俱好奇
阿連舉觴勸我酒
阿買研墨書翁詩
長泛鄭生船百斛
日賦鄴侯三四幅
何用身封萬戶侯
但願青箱有人續

昌齡和詩以不得志於賢關有欲退隱之語復用前韻勉其涵養俟時未可真作休休計也

出門休歎知己稀開卷攬取前人奇西園松菊聊笑傲未可遽賦休休詩涵養胃襟容萬斛仰視青天紙盈幅行看富貴來逼人江左家聲子當續

昌齡頻開尊再用前韻

人生常患如意稀利名擾擾何足奇誰能如我惠連弟有園有酒兼能詩種秫西疇都幾斛時見小童持片幅

風軒灑掃又相呼適有嘉魚饋羊續

用前韻題東園

吾園小小遊人稀吾腹便便空自奇
徑草青青可煎飲雨竹娟娟堪賦詩
鮮鮮菊滿東籬斛揚揚蘭入騷人幅
牡丹芍藥紫薇梅四時花卉開相續

賈元識和詩酬以前韻

河東丈人年及稀精神矍鑠心瑰奇
新來移居向山谷一尊時得同論詩
酒量汪汪可勝斛醉後揮毫動盈幅

新詩疏越似朱弦不才何用煎膠續

次韻昌齡西園卽事

世態蠅營已厭驅小園初闢稱幽居
杯深轉覺利名薄心靜更宜花木疎
窓几吟餘山色好軒齋夢覺日華舒
尤憐不棄東園老時復相從辨魯魚

東園小閣丹粉一新昌齡有詩次韻

小園小閣無奇新但喜有酒堪娛賓
西疇種秫可自釀不用勤買拋青春
月明星稀烏擇木吾愛吾廬堪寓目

須知主父五鼎珍不似王猷數竿竹丈夫未遇當安貧
帶經且作鋤園人詩酒過從老兄弟一笑可破雙眉顰
見說西園相繼闢好將因果同栽植子孫清白世相傳
莫同阮氏分南北

夢齡得男老耆喜甚湯餅會中出詩以賀

梅溪佳氣夜葱葱果得奇兒應夢熊湯餅笑歡良不淺

桑弧時節稍相同

子以十月二十八日生
猶子以二十九日生

喜將老眼看

猶子首出新詩賀乃翁從此吾門如謝傅芝蘭玉樹滿

庭中

予有書閣僅容膝東有隙地初甚荒蕪偶於暇日理
成小園徑以通之杖藜日涉於其間幾欲成趣然花
木蕭疎不足播之吟詠謾賦十一小詩以記園中之
僅有者時甲戌仲冬也

小小園

預作休休計先開小小園杖藜成日涉得趣與心論

便便閣

一閣僅容膝閉門塵慮捐讀書心已懶高卧腹便便

青青徑

小徑循園闢青青草色都主人猶未仕時得理荒蕪

娟娟林

遶舍種脩竹清風長滿筵天姿本來淨不雨亦娟娟

揚揚畹

九畹何人種光風泛國香林間今幾許鼻觀日揚揚

鮮鮮砌

吾圃豈不富黃金無數錢誰云何用好霜裏白鮮鮮

牡丹

人道此花貴豈宜顏巷栽春風情不世紅紫一般開

芍藥

十花稱近客千葉重維揚世上無姚魏還他霸衆芳

早梅

北陸寒未半南枝春已回方於雪中種便向雪中開

雙竹

本是一根出相期同化龍慎毋輕剪伐雲路定相從

紫微花

俗名滿堂紅

盛夏綠遮眼茲花紅滿堂自慚終日對豈是紫微郎

梅花次賈元識韻

南枝昨夜暖先回壓盡羣芳獨自開仙客風中飄素袂
玉妃月下試新裁未憑驛使殷勤寄首辱新詩特地來
明日雪晴須共賞為花拚却飲千杯

歲暮雨雪連作稍阻會集賈元識有詩次韻

自從春色上孤根
淫雨經時步不前
愛日未能供宿潤
愁雲依舊蔽青天
溪山咫尺成千里
棋酒因循又一年
今夕籃輿定相過
尊前行樂興無邊

萬府君挽詞

字德昭子
從舅也

東平隱君子當以古人看
孝却豺羣易恩全雁序難
人如心畫正度勝酒腸寬
粲粲三株樹門闌已壯觀
老成嗟不見里巷尚能談
衣解因周急簪還務激貪
蹶蹄心不愠折翼淚常含
瞑目應無恨聲名與佛參

吾母昔逃難攜孥依舅船態多朝暮警恩獨始終全濫
與高門出尤蒙長者憐未能成宅相徒有淚如泉

林府君挽詞

我昔遊庠序寅緣識令孫雅知苗裔遠更喜典刑存俗
子猶遷善偷兒最感恩佳城明日閉墮淚滿江村

表兄璐挺二道人以山茶一根見贈植於便便
閣前每黑甜餘開窓寓目茗椀不捧精神自清
因成小詩

一枕春眠到日斜夢回喜對小山茶道人贈我歲寒種
不是尋常兒女花

又覓沒利花

沒利名嘉花亦嘉遠從佛國到中華老來恥逐蠅頭利
故向禪房覓此花

二道人以抹利及東山蘭為贈再成一章

西域名花最孤潔東山芳友更清幽遠煩文室維摩詰
分韻小園王子猷人鼻頓除浮利盡同心端與國香侔

從今日講通家好詩往花來卒未休

抹利見佛經名義未究或云沒者無

也謂聞此花香者令人寬悟而好利之心沒故前作沒利此作抹利姑兩存之

覓海棠

壽昌文郁師植海棠二根於所居舫齋之旁予偶以
社日訪之啜茶既罷開窓賞花時烟雨初霽奇葩正
芳嫣然在軒檻中殊有佳韻越五日作詩寄之且欲
覓一根種於小園中朝夕觀賞庶無忘高人雅致時

紹興乙亥

好事高人重海棠兩株分植舫齋旁恰當燕子來時放
更向禪房深處芳道眼想應憐不俗痴人何苦恨無香
梅溪野叟曾經眼欲覓一根栽草堂

郁師贈海棠酬以前韻

珍重高人贈海棠殷勤封植弊廬旁固宜花裏稱名友
已向園中壓衆芳萬樹總含兒女態一枝獨帶佛爐香
杜陵應恨未曾識空向成都結草堂

札上人許贈山丹花且云此花三月盡開俟藥

成移去至上巳日以詩索之

人間花木眼曾經未識茲花狀與名丹却青山暮春色
續他紅樹墮時英梅溪野老栽成癖蓮社高人諾不輕
小小園林綠將暗早移芳藥看敷榮

表弟津上人有瑞香抹利戲覓之

瑞香早入江南夢抹利來從毘舍園久與道人同寂寞
不如來薦孔融尊

覓李仲權碧桃

紅雨紛紛空自繁
碧雲一朵勝桃源
君家獨有神仙種
分我鬧花深處根

覓李仲達醖釀

名園羽蓋謾童童
不似青虬出甕中
好事主人仍好施
定移韻友乞山翁

和寶印叔送春二絕

潛澗園林幽更奇
送春歸去有新詩
風光流轉身長健
又見明年花滿枝

青春不覺去堂堂把酒誰分此日光偶讀高人送春句
味回齒頰有餘香

族兄文通贈山茶

野性無端喜種花吾兄得得贈山茶鶯聲老後移雖晚
始四月栽鶴頂丹時看始嘉雨葉鱗鱗成小蓋春枝艷艷首

羣葩自慚欲報無瓊玖來往同看本一家

兄弟鄰里日講率會因書一絕且戒其早納租
稅也

屏跡山林頗自安里閭率會有餘歡但須及早輸租稅
不用低顏見長官

萬府君挽詞

字叔永庚子登科

前輩風流久之人尚典刑抱才雖汨沒種德自芬馨養
浩眠龍穴流光屬鯉庭鄉評推燕實所欠獨年齡

太學稱多士奇兒占上游賢書連得雋舍選復居優善
教由狐突興家出萬脩板輿游未遂風樹已蕭颼

屈指吾鄉黨如公今幾何門猶畢萬大男類陸終多壯

志埋蒿里幽光發薤歌河梁嗟未就遺恨滿滄波

張廷直挽詞

意氣軒軒蓋一時牀頭周易造深幾芹芳泮水聲蜚早
花滿河陽迹到稀方外客攜因果去道旁人汲義泉歸
柳川池館規模壯一夕花妖世已非

梅溪前集卷七

欽定四庫全書

梅溪前集卷八

宋 王十朋 撰

詩

左原紀異

樂清之東地名左原中有古井深數丈時冬旱水枯
泉僅盈掬有女子數人提甕而汲綆絕甕墮俄有男
子銳然解衣入井取之既而石陷聲震山谷井深而

石重咸謂壓者必齏粉矣越三日事聞於邑尉周公以職事來環井而視惻然嗟悼命役夫具畚鍤抉石取骸將以葬焉自旦逮午猶未及尸俄而役者驚相告曰井底有聲其鬼物乎公曰此陷者不死須吾以生於是捐已資募能出之者衆力爭奮頭顱稍露而語可辨矣土石撼動勢將復壓救者驚潰公乃整衣焚香叩井而拜命工植板以捍石危而不墮益以緡錢啗役夫俾蹈死以救公未飯吏以進卻之曰必活

人而後食日沒井昏繼之以燭用長綆繫衾挽而出
觀者數百人歡呼震動嗟異其事且以首加額曰
公真仁人也能活人如此某家左原去井所為近獲
終日從公於井旁目擊其事作詩一篇以紀之時紹
興乙亥仲冬四日也公名邵字嘉成婺州永康人

君不見溫公年方髫齡時奮然擊甕活小兒至今遺事
在圖畫活人手段良可奇又不見耿恭昔年困疏勒孤
城鑿井踰千尺慙衣一拜精誠通俄頃枯泉飛為液樂

清有地名左原地幽井古知幾年一朝陷溺誰氏子萬
石壓腦沈黃泉路隔幽冥生望絕三宿沈魂豈能活鬼
神莫救功莫施天遣仁人為之出彩捧來臨驅五丁扶
石求尸俄有聲頭顱半露語未辯人疑鬼物相視驚拯
溺辛勤功未果土圯石歆紛欲墮爭言陷者不復生救
者徒遭頽壓禍梅仙惻然臨井旁焚香再拜祈彼蒼散
金募衆蹈死救手植板榦加隄防土石相銜危不倒壑
粉餘生僅能保須臾奪命鬼窟中萬口歡呼喜填道翕

然輿論咸奇公異事行將達帝聰感物誠居耿恭上活
人手與溫公同況公才學俱超絕吏隱那能久淹屈使
君前日飛鶚章莅事詳明已廉潔鯁生桑梓居此間具
書目見非妄傳太史採詩儻見取願付銀筆書青編將
見大書特書屢書不止此史筆芬香此其始

法燈俊上人惠杜鵑花

杜鵑嘉樹狀非常久向緇林壓衆芳春去尚疑啼蜀魄
客來還錯認丁香

比與諸公同游法燈有
錯認此花為丁香者

高人好事栽

蓮社野叟移根植草堂習氣未除端自笑賞花街惠意
難忘

法燈聞上人和杜鵑詩酬以前韻

道眼相看頗異常遙遙蓮社有遺芳兩篇詩好無蔬氣
四季花然帶佛香杖錫何時離竹徑尋山莫惜訪槐堂
小園花疏煩題注詩往花來未可忘

孫先覺母夫人正月四日生時年八十

丙子

莫開四莢瑞新春瓦弄幽閨應此辰蛇虺夢中祥女子

鳳凰占裏吉佳人平生不負三從義老去兼全五福身
他日奇兒亦黃髮捧觴猶得壽慈親

明慶懺院上方地爽而幽蓋精籃之勝也予因
會友託迹於其間一日探囊中得石刻詩一本
乃王瞻叔國博先生題台人秀野堂也摹寫景
物頗類於此因置之壁間意有感觸遂借其韻

二月二
十五日

下帷精舍遠塵繁境淨心清事不關案上忘機有黃卷

眼中得趣是青山林泉欲共高僧老事業未容吾輩閒
準擬他年掛冠後飄然杖履白雲間

懺院種蘭次寶印叔韻

偶向緇林植子芳光風入院泛幽香他時倘免芟鋤患
餘馥猶堪供道場

不放凡花染道場故栽芳友伴禪房一盤喜遇高人賞
却勝家園十八香

次濟上人韻

老來未厭短檠光又集青衿就故鄉却荷道人能具眼
不同時輩有他腸心傳潛澗源流別首出新詩意味長
我亦筆頭為佛事未應中國異西方

玄鳥至

昆蟲方啓戶玄鳥亦知辰去自盲風候來逢化日春深
條烟雨濕廣廈羽毛新故壘尋遺跡雕梁拂舊塵早鶯
宜結友秋雁不同賓嘉爾能知義無忘舊主人

陳希仲贈山茶

都勝名花入小園，羣芳無復敢爭妍。
童童翠蓋藏春色，艷艷繁燈照雪天。
青蘂似開吾輩眼，高標不染俗流錢。
此花端有歲寒意，好賦甘棠蔽芾篇。

酴醾次賈元節韻

春山杜宇喚人歸，歸見酴醾滿架垂。
葉底半開千顆白，鬢邊斜插一枝奇。
園林綠樹成陰後，亭院青春欲老時。
把酒對花歌數闋，濡毫更和鹿巖詩。

賈海松贈僧希月

海石真宜植海松青青不改四時容道人妙得栽培力
乞與書齋待化龍

浴佛無雨

俗言浴佛天必雨今年浴佛天愈晴招提鍾磬集梵侶
世尊塵埃思一清紛然膜拜口誦偈舉頭看天紅日明
或云天意與佛拘

老行者云天與佛打拘

不放雨師龍伯行天雖

不雨佛亦浴誤此億萬蒼生情廟堂何人職調變勸天
與佛無使爭沛然一雨四方足億萬蒼生俱沐浴

喜雨用前韻

去年春夏人苦雨今年春夏人厭晴
水枯秧老農務急
霈然膏澤來太清
小民易怨亦易喜
不知天意常分明
何須頻禱應上公
但起夏禹陳五行
五風十雨堯舜世
自古天意緣人情
今茲一雨荷帝力
龍神社鬼無妄爭
南畝有餘人意足
蠶已三眠更三浴

雨止復用前韻

水枯秧老農欲雨
麥黃桑綠蠶欲晴
一朝大霈滿四澤

雲收霧掃天還清。曰暘曰雨豈人力。聖德仰荷吾君明。
廟堂況無癡宰相。不怕泥濘妨牛行。布穀催耕策知務。
鳴鳩呼婦殊有情。平原出水雲吐日。陰陽得所無戰爭。
明日陽光照臨足。今日陽鳥已先浴。

孟夏十有一日時雨初霽晨登高閣極目四望
烟銷日出氣象一新復用前韻

蝶夢驚回聽殘雨。鳥聲喚起欣初晴。梵宮烟火帶餘濕。
黌舍几席生微清。披衣登閣忽四顧。頓覺遠目增雙明。

樵漁欵乃霧中出舟楫蕩漾田間行清和節物滿眼界
柳垂暗綠花含情窻明几淨日漸永天開地廓陰不爭
俯視滄浪堪濯足遙看扶桑觀日浴

再用前韻勉諸友

蠶婦欲晴農欲雨書生事業無雨晴况茲長日足可惜
薰風入戶精神清虛窻文字遮眼暗短檠燈火通宵明
紙為良田力耕穫一廛稼穡嗤許行太山北斗仰韓子
千態萬狀窮周情羣居涵養務渾厚藩籬剖破銷紛爭

拭目天衢驤驥足下視汙池雀兒浴

穎師贈樾栽

自從兒時食火樾思欲移根向鄉里年來花木浪經心
品色徒多真戲耳道人贈我方外根不比尋常桃與李
枝根宛類秦大夫功效端如使君子殷勤栽植同因果
衆目紛紛等奴婢他年摘實薦新時杖履相從蓮社裏
月上人以拳石植海松蒔菖陽於四際蒼姿秀
色鍾清氣於几案間以為梅溪之野人贈兼惠

詩章因與酬唱凡四首

蒼蒼千尺大夫松不似湖嵌植小龍枕水一泉形翠律
凌雲三幹色虬茸玉衡星化姿兼茂蓮社詩高席可重
乞與書窓端不惡蕭然如對德人容

處士何須種七松賸栽海上綠髯龍靈根頻灌蒼如玉
黛色初抽軟似茸蘸水小山形鑿鑿引年昌歎節重重
道人分得歲寒種一洗梅溪憔悴容

禪杖西游覩萬松歸栽九節伴蒼龍何須偃蓋藏龜甲

自可延年勝鹿茸，贊老房幽看更好。畫公詩險和難重，
為師旦旦加澆濯，不遣塵埃上綠容。

澗毛纖細蔭青松，會見成仙與化龍。孤嶼兩峰多臭味，

孤嶼多
海松

一莖九節異香茸。羨師得句侵澄觀，顧我談經

媿叔重。明日還家帶滄海園林小小可能容。

懺院種紅蕉用寶印叔韻

新植靈根續蕙蘭，緇林佳處占清閒。深紅應費化工染，
濃綠疑從帝所頒。正色可曾娛俗眼，晚英猶足慰衰顏。

他年解組歸三徑多種青青滿故山

題佛閣三絕

佛閣閱人久儒官涉世疎伽藍真長者容我半年居
桑下不三宿閣中經半年青山滿庭戶雖好莫留連
靈運本狂客偶來蓮社遊鐘魚聽已厭歸去故園休

題郭莊路

南山有井名黃花我卜別業臨其涯酌泉漱石思往事
天遺景與名俱嘉東籬採菊隱君子悠然凝望南山賒

茲人高躅已千古三徑蕪沒堪咨嗟我生本抱丘壑尚
誤涉塵世爭浮蝸十年太學志未遂歸來隴畝躬桑麻
草莊新築亦不惡青山遠近光交加會須移住效杜老
終賦歸去師陶家新涼入郊九日近西風漸欲吹烏紗
龍山風俗有故事撩我清興凌烟霞

率飲亭二十絕

吾門非北海安得客滿坐有亭名率飲鄰里日相過
蒼頭稍知耕赤腳頗能釀有田俱種秫我日坐亭上

幽亭濶方丈脩竹種千百有時人不來影月為吾客
富貴有天命安貧士之常聊為真率飲未用利名忙
老去識交情興來懷酒伴山林車馬稀風月壺觴滿
文舉客滿坐淵明酒盈尊雖無古高躅妙意亦常存
文字粗能飲聖賢時復中林間十二子賓主自清風
富飲不解文翁意非在酒三盃聊遣興一醉豈緣口
我游醉鄉中常在軟飽後誰脩醉鄉記添我姓名不
吾家數兄弟薄有古人風生計何曾足酒盃無日空

右十絕書於左牆以坐上客常滿尊中酒不
空為韻

我性野而率山林謾求安有酒固可樂無酒亦自寬
亭上可率飲林間宜率吟每於詩酒裏寓我率然心
結交雖不泛絕物亦何曾莫問親疎客過門無不應
交游聚散中身世浮沈裏觀書悟昨非把酒知今是
有酒或無客有客或無酒何時此亭中客酒兩常有
是非何足論詩酒謾消遣但把無他腸聊為在家善

燈火散交游園林寄幽興萬事付無心隨緣不求勝
心向靜中求身宜閒處著閣已號便便亭宜名莫莫
吾家老兄弟杖履日相過對酒懽無限論詩味更多
有口但飲酒無悰亦作詩他年宦南北還憶在家時

右十絕書於右牆以寬心應是酒遣興莫過
詩為韻

橫山連氏妻方奉姑甚謹姑死刻木像事之越
十年不急郡守張公子韶下車命諸邑訪孝義

予披牒至其家獲觀木像感歎不已因書四十
字時紹興丙子七月十四日也

純孝世稀有事亡人所難堪嘉里曾子況有婦丁蘭守
令方尊禮鄉閭競聳觀名將聞帝闕旌表及門闌

登姚輿嶺望家山有感

昔年度茲嶺回首念慈親如今望雲處惟有淚沾巾

題驛輿張店思周光宗

憶昔同行宿此村重來堪歎止吾存芙蓉雁蕩重經眼

舊事無人與共論

度雁山

雁山五經眼茲行尤可觀初冬天氣佳雁歸山未寒有

日照幽谷無雲翳層巒入境見祥雲祥雲振衣登馬鞍

馬鞍瀑水飛王龍兩龍羽旗導翔鸞展旗石柱屹天

外天柱卓筆書雲端卓筆靈峯觀石室杖屨穿巔岼山

禽知我來好音若相歡登羅漢洞有禽鳴羣峰列春筍

丹青狀尤難靈峰新創行色媿匆匆更約他時看

丹青間

度謝公嶺

十年九行役屢經此山中愛山不厭觀每媿行匆匆大
士瞻矩羅騷人思謝公一生看不足語如白頭翁

臘日與守約同舍賞梅西湖

西湖處士安在哉湖山如舊梅花開見花如見處士面
神清骨冷無纖埃不將時節較早晚風味自是花中魁
暗音和月入佳句壓盡今古無詩才武林深處景益勝
十里眼界多瓊瑰北枝貪睡南枝醒杖屨得得攬出來

旅中茲游殊不惡況有佳友銜清杯手折林間一枝雪
頭上帶得新春回

同舍再約賞梅用前韻

梅溪野人真野哉老眼長為寒梅開
竭來西湖探春色
濡毫一洗胸襟埃却將梅花比和靖
花與人物俱奇魁
同行二十五佳客一一盡是離騷才
新詩一出花價長
糠粃桃李奴玫瑰湖山已槁處士骨
風月未厭吾儕來
欣聞好事約重賞准擬滄玉嘗春盃
預辦長牋收白雪

載取十里清香回

前日探梅李元翁以疾不往和詩有玉華野人
多病腦獨守寒爐煨芋魁句復用前韻約同賞

西湖十里真佳哉百花未放梅花開吾儕好事頗成癖
探春不憚衝風埃李生不出苦病惱書閒肘後占河魁
膽瓶相對數點雪錦腸寫出飄然才人如西湖有涵養
句與和靖爭奇瑰重尋勝游有新約湖山準擬詩仙來
寒爐蹲鴟不必煨為花痛飲拚千盃願君及早理杖屨

莫令立馬頭頻回

送王司業

元龜

守永嘉

中興天子初龍翔臨軒策士當維揚艱難果見異人出
龍虎甲乙俱非常先生大對過晁董指切時務言激昂
麟經絕筆二千載收拾紙上生光芒自從曲江到今日
勁氣獨得南方強權門用事手可炙申張亦減平生剛
先生閉門玩文象簸弄日月潮之陽帝憂南國命共理
袁連二政俱循良公道方行正人用詔起韓愈師虞庠

先生不作進學解直言慷慨投封章一麾出守山水郡
十行詔墨加恩光東嘉得賢類京兆前政有張今有王
前守張子韶張公到官席未煖猶有遺愛如甘棠先生況是

儒宗師斂此大惠施一方入境顧問民疾苦下車宜誅
吏奸脏首延瑒孺坐賢榻無使楊墨登門牆河內借恂
豈容久宸衷念賈殊未忘鯁生捫衣恨太晚執經未獲
時登堂私心竊喜父母國聖恩特許來龔黃願同何堅
首率化歸見潁川鳴鳳凰

春日游西湖

丁丑

卷八

山色綠如染湖光青似磨
峯高捧日久波濶浸天多
瑞氣浮城闕春光醉綺羅
能將比西子妙句有東坡

梅溪前集卷八

欽定四庫全書

梅溪前集卷九

宋 王十朋 撰

和韓詩

和秋懷十一首

丁卯季冬赴省試臨安至明年莫春側翅東歸既至
會稽復還太學時方首夏草木敷榮良苗懷新游目
原隰與物助欣至閏八月告歸復尋故道雲水已空

卷九
園林初落悽然感觸不能自已是月十有七日言息
其廬定省之暇親戚鄉里日相過從有詩酒之樂愜
然無復得失之在懷也清夜兀坐短檠自照誦韓退
之秋懷詩十有一章欣若有晤因追其韻太山北斗
我實慕之白雪陽春和以巴詞云

孟夏游會稽禾稼方疑疑南風翼新苗生意殊未已重
來覺非久相去百日耳黃雲萬頃空蘋末涼風起園林
亦搖落觸目成疑似人生過隙駒朱顏何足恃胡為向

迷塗奔走不停軌得失無榮辱歸來實堪喜

草木無利名時來自榮悴人生異草木百念起心地困窮斯感傷利達或驕恣一朝同物化榮辱兩何異有酒且行樂不必富與貴

直道疾伊優壯懷增靡曼海上豕方牧夜中牛屢飯半生營一名偃蹇未如願青銅忽自照白髮已堪歎斥鷃適蓬蒿大鵬搏九萬物情貴得所奚用求自獻富貴似可喜貧賤亦何怨

秋雨浸成潦秋霜漸為凌老樹暗寒蟬腥盤集痴蠅天
涯有歸客面目吁可憎吟餘自捫腹肝膽空稜稜臨淵
不羨魚籬頭掛寒冒數傳茅屋下養此百不能

秋懷蟲共悲秋夜鶴同警輝輝玉繩低耿耿銀漢永靜
思鳬舄喬遐慕螭盤猛途遠慵著鞭井深艱下綆鳥倦
當知還馬失亦云幸窮通委天命塵慮可深屏

客路厭繁暑歸懷愜新景枕冷夢自清夜明窓更問聊
棲明月枝勝逐西風梗支床甘自息伏櫪倦思騁惟有

問目心拳拳慕回請

寔凡生新涼燈火照初暗省已有昨非探懷無宿憾古
書恣掀翻古意薄窺瞰心將遊寂寞語復攻苦淡實歎
名忌浮才疎得懲濫守志懼不堅入道恐成暫性柳戒
戕賊心猿思繫纜有友頻琢磨無官自校勘澹然學揚
雄不恨儲無甌

賢關謁多士頭角爭軒軒中有倦遊客虛名厭馳犇學
為忠與孝思踐陽城言高秋賦歸去戲舞庭闈前東園

柿栗熟採摘供盤飡兄弟各賦詩集作棣萼編甲乙二
孺子日誦言半千學語三歲時笑味生甜酸欣然動我
懷長夜不成眠歸來有此樂亦可終殘年

吾廬有脩竹滴翠凝不乾天風一吹拂終夜鳴琅玕黃
楊亦嘉樹一甕何團團日暮飛禽歸啾然欲求安嗟予
欲何為屢涉吳江瀾一名竟未就舉彈空飛丸對竹賞
佳樹聊繫予征鞍

商飈起何處古樹生秋聲肅肅夜氣寂悠悠月華明兀

兀念前古孜孜殫寸誠默默守孤陋兢兢防滿盈至
役詩匠愁來驅酒兵自適布衣願未覺青衫榮長鬚與
赤脚亦足供使令

鮮鮮霜中菊誰云晚不好開日即重陽雖晚亦同蚤對
景便須醉浮生苦難保胡為楚大夫不飲致枯槁何如
醉鄉人雖醉亦有道

和符讀書城南示孟甲孟乙

性無有不善茲言聞子興學所以脩性揚雄著之書欲

知人之生靈臺湛然虛習善裕乃身習惡喪厥初下惠
與盜跖不生兩門閭所趨一不同相去霄壤如是以吾
夫子詩禮教伯魚當時非義方聖門亦蕭疎我似杜陵
翁有兒最憐渠徒愛不知教懼如驢與猪詎望登丹霄
折桂騎蟾蜍粗令有聞見免為甕中蛆邗角入小學首
誦仲尼居要知先孝弟餘力哉乎歟我家素孤寒金玉
苦無儲舊業止青箱辛勤二星餘遺爾以清白爾曹宜
念且性情乃良田學問為耘鋤勿患遠難致跬步馳蹇

驢勿憂年不逢六經有新畬勿隨莽競流伺候人庭除
勿學田舍兒黃金買冠裾在我能自修不患無聲譽我
久困筆硯退思老山墟拭眼看爾曹庶使愁腸舒詩篇
和韓公座右宜書諸青春最堪惜勉矣無躊躇

和醉贈張秘書寄萬大年先之申之

戊辰十一月十一日過萬橋是夕會飲先之家同銜
杯者四人大年先之申之及予也促席而坐頗有清
歡醉中誦昌黎先生贈張秘書詩人皆勸我酒我若

耳不聞今日到君家呼酒持勸君之句既別遂和韓
韻贈三君子

良友不易得清談苦難聞前夕知何夕我來訪諸君共
對燈燭光芳尊細論文通家忝孔李促席聯機雲杯盤
畧荷禮氣味同清芬一盞洗窮愁三杯話離羣春舟會

稽別

孟夏別大
年於會稽

秋袂錢塘分

七月先之歸
八月申之歸

顧我與三友

新當敗孤軍飄零各南北對酒無復醺客況飽牢落時
光負氤氲聚散實堪恨榮枯何足云歸來已三月俗狀

日紛紛幸此同一笑盤飧釘腥葷蠓山薦巨房龜脚烹
脩裙良辰屬嚴冬敗懼無蠅蚊痛飲竟長夜高歌和南
薰雖非韓孟張所飲亦典墳何時脫場屋南畝同耕耘
晝為雞豚社夜策詩酒勲此言宜早踐勿待桑榆曛

和縣齋有懷四十韻

予所居之乘偏有室甚陋目曰陋齋客過而病之曰
子陋矣哉予曰居九夷而不陋者夫子也予不敢學
居陋巷而能樂者顏回也竊有慕焉揚子雲曰晞顏

之人亦顏之徒孰謂茲室之陋而不足以寄吾樂耶
何病之有既而讀韓公縣齋有懷遂和其韻目曰陋
齋書懷

讀書窺古今掩卷成叱咤唐虞昔垂衣禹稷起躬稼人
材各超絕王業迭興謝典謨光日月雅頌藹蘭麝子輿
論易地顏淵堪並駕窮達雖殊途聖賢實同價避就鄉
隣鬪泣笑疏戚射甘心惟飲瓢沒齒不談霸斯人嗟已
亡末俗遂多詐祿從枉道求氣為權門下爭為邑犬吠

翻取獵師罵幽人思隱盤高士欲耕灞予生苦多難安
跡殊未暇冬行輟兩足夜坐癢雙髀黃卷徒自勞青雲
未能跨借勢乏王公成名無僕射大學厭葢鹽親闡疎
膾炙眷眷日懷歸區區每求假飛同鷁過宋閒若馬歸
華陋巷懷哲人短檠燒午夜對床有兄弟通家足姻婭
談笑開芳尊塵勞釋征靶篇章日盈囊卷帙時抽架詠
歌同舞雩歎息殊觀蜡有田聊代祿無謫不祈赦未為
雄草玄謾學愈直鑄嘯傲窮朝曛絃歌達冬夏頭角姑

自藏齒牙誰肯借眠從弟子嘲醉不金吾怕心知得失
妄眼見炎涼乍造物豈吾苦交情勿渠訝馬來未為福
火盡安足藉孝弟儻自修長幼必能化力耕西疇禾剌
種東臯柘旨甘奉盤飧溫清飾臺榭斗粟鑒漢謠一饗
共崔舍仰効慈烏哺俯笑寒鷗嚇但令尊不空莫厭客
頻迂風篁觀掩冉山禽聽嬌姪困窮乃吾幸此禍不須
嫁

和桃源圖

世有圖畫桃源者皆以為僞也故退之桃源圖詩詆其說為妄及觀陶淵明所作桃花源誌乃謂先世避秦至此則知漁人所遇乃其子孫非始入山者能長生不死與劉阮天台之事異焉東坡和陶詩嘗序而辨之矣故予按陶誌以和韓詩聊証世俗之謬云

嬴秦斬新開混沌傲睨前古無虞唐詩書為灰儒鬼哭李斯秉筆中書堂長城丁壯無還者送徒更住驪山下避世高人何所之出門永與家鄉辭入山惟恐不深遠

豈是得已巢於斯來時六合為秦室未省今為何歲日
吏不到門租不輸子長丁添更何卹春入山中桃自花
招邀隱侶傾流霞男耕女織自婚嫁派別支分都幾家
誰泛漁舟迷處所山開洞關聞人語乍相驚問卒相歡
設酒烹雞講賓主可憐秦事已茫然帝業初期萬萬年
猶道祖龍長在世豈知異姓早三傳鄰里慙慙爭餉饋
人情與世無相異未信壺中別有天却訝身游與夢寐
山花亂眼鳥哀鳴數日留連喜復驚更從洞口尋鄉路

逢人欲話疑非情異日遍舟欲重顧水眩山迷紅日暮
後來圖畫了非真作誌淵明乃晉人

和永貞行

予自少喜讀柳文而不忍觀其傳惜其名齊韓愈而
黨陷叔文也退之與柳善及作順宗實錄未嘗假借
公議之不可屈也如此戊辰仲冬二十有二夜讀韓
詩永貞行至予嘗同僚情可勝之句則知退之雖惡
伍文亦未能忘情於劉柳輩也予既追和其韻遂於

八司馬中獨詳及柳蓋惜其人而深責之耳

君不見天為元和開號令先遣儉人竊朝柄奉天難平
閒虎豹奕客待詔來京師口中班班談治道貞觀開元
何足為黨與紛紛自標置遠借伊周供佞媚望塵附火
皆美官怨修睚眦曾不難梯媒爵位由貨賂斥逐朝士
因杯盤珣瑜卧第郢佑默誰為唐室回狂瀾朝攘利權
未為怪莫奪兵柄尤可歎仙李蟠根未為艾千葉神器
那容干禁中大義知誰主東宮受禪同二祖越兒涕泣

吳兒悲從此豺狼不生羽剛明天子位初登翦除元惡
流凶朋八州司馬才可稱節已掃地誰復矜子厚年少
躁飛騰身陷醜黨罹熏蒸著文擬騷愁畏凝欲自辨白
終莫曾王孫尸蟲託罵憎色豈不媿明憲燈所記先友
時良肱忍使柳氏家聲崩吁嗟匪人何足憑士勿妄進
當戰兢退之鯁直憤不勝詩篇史筆兩可徵永貞覆轍
宜痛懲

和短燈檠歌寄劉長方

戊辰仲冬二十有三夜坐六行堂對短燈檠誦昌黎
詩三復興歎既而思友人劉長方昔作燈銘有空洞
其腹直方其形室焉斯通晦焉斯明之句良有味也
僕自念與劉君游二十載矣平日偃蹇之迹大畧相
似去秋同與上庠薦劉遂登乙科僕拜賜而還困躓
如舊遂和韓公短檠歌以寄之

我與君游最久長短檠夜夜分清光初從鄉校共牢落
晚入太學同淒涼眼看兒輩盡騰踏尚磨鐵硯穿檠床

君今已作青雲客萬言曾射天庭策藍袍歸拜七十翁
壽酒十分傾太白嗟予偃蹇只如前日高空作盧仝眠
樂事已輸君自恣銀燭高燒環翡翠直形空腹舊時燈
牆角未應容易棄

和苦寒

羲和錯冬令寒燠常相兼在人為不常時焉作貪廉玄
冥當用事如忌還如謙宜寒噤不噓羣萌誤抽尖既燠
俄吹冷夜寐黑不甜水行失其理厥疾不可砭前日當

孟冬雷聲震銅蟾三日輒大雪飛花眩觀覘速此始踰
月屢變寒與炎晨起坐東牕陽光快恩霑霜畦秀蔬苗
欣焉自腰鎌頃刻變凜冽枯藤怯提拈齒牙戰霜風縮
舌疑銜箝架抽紛掀翻誰能正牙籤酒杯覺無力瓶罄
勞頻添貂裘尚不煖況無或衣縑兀坐擁黃紬脰作寒
龜潛氣血栗肌體涕洟冰鬚髯紅爐熾薪炭旋覺寒星
滅靜思天壤間萬類何繁纖路傍泣凍餒海角愁廢淹
羽毛有不庇腥血有不燭豈堪當此時可以吾身占慙

懃語妻子汝勿多怨嫌破被尚禁絮漏茅可添苦人生
苟知足處此意亦恬但願王化行東西俱被漸堯天日
舒長有目皆可瞻寒生在陋巷甘心事蠶鹽何須傍人
門炙手隨奸儉耽耽王侯宅笙歌下珠簾寒暑止溫涼
焉知有窮簷否泰迭往來禍福相依黏勿用倚彼玉自
分安吾兼飽腹日三飯蔽形衣一襜祁寒勿怨咨庶用
懲無厭

和南食

萬先之送巨蠮百房大破饒願正魚吸間記憶前日
作東平客飫啖茲味先之舉退之南食詩蠮相黏為
山千百各自生之句僕方追和韓詩遂用其韻以謝
海錯千萬族惟蠮不能行潮來腹自飽亦足遂厥生翻
笑魚鱗蝦晨夜何營營風味與江蜩可以次第名薦身
炮炙間殼破材始呈北客昔南食一見生怪驚故人居
海濱羣鮮厭魚烹酷愛此味真不假薑桂橙遙憐山間
友混迹黎與駢蔬腸久不飽肌骨疋且獐巨房餉饒腹

一笑百念平豈為飲食欲實見親舊情誰知藿鹽餘盤
食味常并故鄉實堪戀未用圖西行

和聽穎師琴

黃巖施生挾書來梅溪從吾弟夢齡游以裹糧餘資
易琴一張講習之暇時一弄焉季冬之朔燈火初夜
風靜籟息明星燦然坐南窓之下為予撫之予素不
曉音律妄憶古人琴中之趣欣若有得聽終遂歸陋
齋誦退之聽穎師琴詩掩卷慨然予既嘉施生雅尚

遂和其韻以贈

七絃自相語唱予仍和汝十指忽淒涼騷人悲戰場大
絃溫和小清越惠風夷韻參悠揚琴瑟鳴寒泉來儀舞
鸞凰山高水遠聽愈淡花奴羯鼓聲方彊施生幽雅士
不好笙與篴千金買焦尾悠然坐藜牀顧我非知音感
激涕自滂三聽輒三歎義皇在我壑鹽腸

和憶昨行示夢齡

夢齡弟近感微恙情緒常若不佳予懼其噎鬱傷和

也因誦退之和張十一憶昨行云無妄之災勿樂喜
一善自足襏千災頭輕目朗肌骨健古創新磨塵
埃殃消禍散百福併從此直到耆與鮑之句以慰其
懷既又和以贈之

憶昨少年氣銳心未灰平明出門薄暮迴解衣換酒期
必醉亂花壓面歌條枚年華荏苒今半世觸事往往生
悲哀歡娛無復少年味勉強談笑陪尊罍飲縱過量輒
成疾秋霜入鬢剛腸摧子年少我氣鼎盛琅玕夜誦聲

如雷宵中平時足蘊藉頤神養素成嬰孩松姿栢質異
蒲柳堅剛不怕霜霰摧凌雲變化未可料豈比嶮岨風
中梔胡為鬱鬱乃如許與我老者同虺隤豈緣心事未
如願一念遂覺憂愁來還驚世態多險阻忤意未免生
嫌猜壯懷千里力未致齟齬反類三足能傷和伐性致
坎軻兩眉感恨憑誰開吾聞君子貴知命數者於我何
有哉又聞古人亦逆蹇在易固有无妄災閉門靜坐養
時晦拂拭心鏡捐塵埃他年定作仁者壽齒背會見同

鯢鮐聖賢遺訓載于腹此事寧不知所裁否往秦來固
有日坦塗利轂寧須摧

和燕河南府秀才送周光宗

友人周光宗將叅告太學某誦退之燕河南府秀才
詩末章云陰風攪短日冷雨澁不晴勉哉戒徒馭家
國遲子榮以祝其行既又和以送之取古人賦詩斷
章之意云爾

吾皇尚系理北客來輸平投戈講文藝虞庠萃羣英藹

謁六年間人物如西京菁莪各成材龍虎威標名東嘉
號多士半作鴻都生昭然藻鑑中不負事業精先進日
通顯天衢作雷轟後生益可畏行藝方蜚聲賢哉汝南
丈頭角令人驚撐腸飽文史欲振三年鳴偃蹇未如志
造物殊無情歸來務遵養絕意蝸角爭高堂有慈親祿
養須大烹壯懷不能已千里提短檠掉頭脫塵鞅舉翼
摩太清賤子忝交未平生荷推誠緬懷去年春駕言共
西征悠悠舊時路君今獨先行江梅弄春色愛日烘新

晴勿憚行役苦會見歸來榮

和答張徹寄曹夢良

某與夢良遊十有五載矣栖遲偃蹇之迹初不相異也茲復同舍上庠交契愈篤曹秋賦暫蹶予春闈退飛別已暮面猶未會追念疇昔泮宮之樂鄉校之游鼓雪棹於金溪振風葛於清遠門之外不無慨然因誦退之答張徹首章辱贈不知報我歌爾其聆首叙始識面次言後分形遂和其韻以寄之且速其肯來

也戊辰季冬十六日

故舊別云久話言猶未聆歲暮念愈劇宵長夢形頻憶
昔始傾蓋相看俱妙齡參乎方越席鯉也纔趨庭樂泮
共采藻泛江同食萍玄深探義畫狂妄窺麟經端能辨
箕亥未省分雷霆卷帙發晨架膏油燃夜櫺君才富八
斗我字識一丁輕縑苦窘幅高屋欽建瓴低頭願為愈
割席終慙寧結游指寥廓約泛航清泠驥足騁天駿黿
頭緡海腥塗遠困塵鞅棹迴閣寒汀壯懷誓白水憤氣

干青冥孤嶼散形影雙溪隔滄溟耿耿月遙共悠悠門
獨扃論文憶李白對酒懷劉伶鄉校鼓沂瑟頌章賡魯
駟濯暑振風袂破寒操雪舲勝游倣栗里雅會修蘭亭
瓶罄沽甕蟻燭殘照囊螢猖狂却大雅酩酊還獨醒槐
市忽飛詔英才先振翎短檠歌慷慨長劍磨晶熒舊恥
雪赤壁竒功收井陘高價壓羣玉新文麗繁星鄉閭借
光艷庠序資儀刑隨羣袍暫白唾手衫當青殘生適孤
苦舉足方伶俜文房泣遺澤座右悲先銘犬馬不填壑

鳬翳卒同涇射縞服彊箭撞鐘施寸筵惟求免場屋詎
望揚王庭師旋約奏凱案就期脫圉勢屈戰徒力命奇
不文靈秋翼困燕雀春苗害蟲螟日念返桑梓願言和
鸞鈴溪山有偕隱風雨無獨聽懸崖踏蒼翠怪石穿龍
玲豹閒眠霧窟鳥倦棲雲屏世情自翻覆交態長芳馨
歲時覺在苒咫尺如飄零盈虧屢瞻桂開落頻觀蓂欲
去廢負米念來方祝岭何時搵子手一笑空吾瓶注目
杳雲雁緘書附原鵠鄙吝佇滌胃鈍頑資發鏹得得戒

徒馭遲遲趨闕廷猶勝炙手輩奔走趨公廳

己巳元日讀送楊郎中賀正詩因和其韻

曉日五更雞唧喔銀釭明滅燒餘脂家家呼牛逐耗鬼
牛歸誰家鬼何之皇都朝會我無與西疇春事行及期
弟兄成行拜親老猶勝去年身未歸

人日過電山隨行有昌黎集因讀城南登高詩
遂次韻留別孫先覺

臘去梅已稀陽浮柳初弄斗新轉梢東風漸消凍為

人節固佳顧我身無用命駕訪親交肩輿勞僕從門闌
念久別燈燭忻此共興來酒自斟歡至歌頻送提壺勸
銜盃播穀催除耨農耕方迫歸行樂未能縱人生苦離
別俗狀嗟倥傯春風桃李花把盞何時重

和李花

梅溪書院有李數株土寒花瘦游人不之賞因讀退
之詩平旦入西園梨花數株若矜夸中有一株李顏
色慘慘似含嗟惻然有感遂和其韻

春風入園林萬卉以艷爭相夸胡為此仙李顏色憔悴
堪咨嗟稜稜瘦樹數點雪半醒半睡風軟斜枯枝膚剝
少生意況有疥癬相孽芽不如兔葵及燕麥妍媚春色
搖纖葩下自成蹊直虛語誰肯顧盼留香車顧我逢春
少行樂老眼日有文書遮自憐衰颯已如許那更對此
愁人花

皇都二月桃李盛朱輪翠蓋方紛拏東君世情亦太甚
十分春在侯門花試吟怨句問蒼昊一種春工何損加

白華秉燭光照夜此樹不屬孤寒家造化無言意潛告
我愛萬物初無差物情稟受苦自異奚有厚薄施萌芽
勸君勿為花致怨居易俟命思無邪

和答柳柳州食蝦蟇

蝦蟇水蟲也不為人害與螟蝗之類不同然周官蝻
氏掌出去鼃鼃以灰洒之則死說者謂蝻與耿鼃尤
怒鳴聒人耳故去之予竊謂此非周公之用心必後
世傳習之訛而附益其說也退之記其事於詩未免

乎勸矣己巳仲夏羣居梅溪諸友頗嗜此味丐者爭
捕而致之予懼其殺物滋多和韓詩以戒

蟲魚千萬族一一異狀貌飛潛同一性巨細何必校彼
微水中鼃四足偃而匏自從科蚪初生育在泥淖好鳴
乃其性非故欲喧鬧蝸氏掌洒灰恐非聖人教吾聞人
間世生死同夢覺殺物傷吾仁忍聽聲燁爆況我儒衣


冠絃誦生鄉校彼亦呼子曰有意欲吾効

諺云佳近孔
堂蝦蟆呼子

曰故以
為戲

人蟲各好生奚用苦相撓退之憚食蛇得得釋

籠罩子厚放鷓鴣仁心亦稍稍胡為於此蟲未盡忘嗜
樂薦祠用梟獍穿窬誅虎豹古人豈妄殺去害除不孝
願留茲鼓吹駐我寒溪櫂



梅溪前集卷九

欽定四庫全書

集部

梅溪前集卷十二

詳校官庶吉士 臣翁樹培

主事 臣呂雲棟覆勘

總校官進士 臣朱鈐

校對官中書 臣束枋遠

謄錄監生 臣陳萬青

欽定四庫全書

梅溪前集卷十

宋 王十朋 撰

詠史詩

一 伏犧

太古民淳事簡稀
聖人牛首號庖犧
如今四海皆人面
心似山川更嶮巇

六畫中含萬象殊
洪荒一變遂歸儒
河圖不授包犧氏

民到於今日尚塗

神農

民食腥膻鳥獸同那知土穀利無窮後人只祀勾龍棄
誰念艱難起帝功

黃帝

百年功就蛻乾坤鼎冷壺空跡尚存別有慶源流不盡
皇朝葉葉是神孫

唐堯

仁德如天帝業隆四凶不去付重瞳當時黃屋如傳子
千古那知揖遜風

夏禹

洪流浩浩浸寰區民雜蛇龍鳥獸居長歎當時微帝力
蒼生今日盡為魚

啓

堯舜與賢真可法夏王傳子若堪疑謳歌自屬吾君子
不是當時禹德衰

少康

虞仍靡艾共輸忠一旅中興復禹功較德宜優漢高帝
知音惟有貴鄉公

桀

大禹辛勤造夏邦子孫何苦事淫荒國亡不悟生平罪
翻悔當時不殺湯

成湯

帝乙興仁獸網中鳴條一戰遂成功歸來猶自懷慙德

事與唐虞已不同

高宗

須信精誠可動天
高宗一夢得真賢
濟川不賴良舟楫
安得中興五十年

紂

釀酒為池肉作林
深宮長夜恣荒淫
何如早散橋倉粟
結取臣民億萬心

周文王

民疾商辛若寇讎三分天下二歸周文王終世全臣節
不念前時羨里囚

武王

八百諸侯會孟津民心天意總歸仁須知不食干戈粟
自有登山采蕨人

成王

姬旦推誠相幼冲流言交亂出居東誰云王是中才主
一啓金縢卽悟公

宣王

北伐南征萬國臣中興周室賴賢人
崧高千古英靈在何獨當時降甫申

幽王

文武基圖未易量可憐中葉壞幽王
神龍流沫生尤物赫赫宗周一笑亡

秦始皇

鯨吞六國帝人寰遣使遙尋海上山
仙藥未來身已死

鑾輿空載鮑魚還

二世

始皇一怒逐扶蘇天欲亡秦果在胡翻被四方黔首笑
不分鹿馬是誰愚

漢高帝

百戰功成漢業新咸陽置酒問羣臣區區高起王陵輩
豈識龍顏善用人

仗劍崎嶇起沛豐祇將嫚罵馭英雄雖然能用三人傑

已失商山四老翁

文帝

文帝興王自代來百金不費亦仁哉後人不務師恭儉
萬戶千門幾露臺

武帝

武帝英雄類始皇甘心黷武國幾亡晚年賴有知人術
解把嬰兒付霍光

宣帝

道雜霸王非美事治先刑法少仁恩蓋楊韓趙猶誅死
誰謂當時獄不冤

元帝

德化欲遵周軌轍刑名思革漢規模更生疎斥蕭生戮
元帝何曾善用儒

光武

大命由來自有真子輿徒號魏家親須知炎祚中興主
元是南陽謹厚人

鬱鬱葱葱瑞氣浮南陽兵起再興劉將軍大敵非常勇
文叔平生本好亲

明帝

萬乘臨雍事老更橋門億萬會諸生永平天子真儒雅
只恨容人度未宏

章帝

民苦繁苛厭永平科除慘獄慰羣情不窮竇憲欺君罪
翻被寬亲壞典刑

魏武帝

董呂索劉電掃空阿瞞獨步騁姦雄
豈知吳蜀皆人傑未肯全將鼎付公

吳大帝

拔刀斫案氣如虹獨倚周郎立雋功
一戰果摧曹孟德不妨高枕霸江東

蜀先主

曹公姦黠世無雙昭烈雄才肯見容
誰把荊州資霸業

一朝雲雨起蛟龍

晉宣帝

四朝天子寄安危寡婦孤兒豈忍欺見說五湖扛鼎日
又勝三馬食槽時

晉武帝

早歲膺圖帝業光晚年何事政多荒筭來不用平吳好
畢竟吳平速晉亡

元帝

金陵王氣為誰鍾五馬南浮一化龍四海民心共思晉
江東何事却從容

宋武帝

宋武英雄世莫加長驅千里定中華乘機不據金湯險
自剖乾坤作兩家

齊太祖

天厭金刀水德終一時人望屬蕭公能論魏武周文事
獨有區區謝侍中

梁武帝

不法先王治用儒捨身傾國事浮屠堪嗟餓病臺城日
曾得空王救死無

簡文帝

青絲白馬渡江來宮殿酣酣盡委灰不解開門納桃棒
空悲明鏡不安臺

陳武帝

一旦權臣外召君已知天帝欲興陳江淮若道無神物

誰報齊兵至壽春

後主

臨春閣上醉流霞
狎客酣歌興未涯
江左半無陳日月
君臣猶聽後庭花

魏道武

火舉南征破弱燕
拓開中土奠山川
功成若更能修德
自可延年度厄年

北齊神武

浮圖入海天亡魏鸚鵡興謠運啓齊鄴下兵興黃螳死
營中星隕衆驢嘶

齊後主

我冠食祿雄開府搖尾承恩大郡君將士焉能死征戰
盡驅爾輩赴三軍

周文帝

傳檄東征賀六渾親迎天子入長安剩栽沙苑千株柳
長使齊軍破膽寒

隋文帝

孽后邪臣造釁端
房陵幽閉抱深冤
一朝變起宮闈內
方信當時用婦言

煬帝

汴水東流岸柳春
龍舟南下錦帆新
烏聲勸酒梅花笑
笑殺隋亡亦似陳

唐太宗

仁義誰云不可行
文皇親見治功成
德業可惜身先死

豈信人間有太平

高宗

貞觀基圖極盛隆誰將神器付昏童
倒持利柄歸房閤
仙李枝柯一剪空

明皇

天寶君臣玩太平梨園弟子奏新聲
貴妃一笑天顏喜
不覺紅塵暗兩京

肅宗

張后宮中巧弄權上皇西內老誰憐杜陵獨念君臣義
長向雲安拜杜鵑

德宗

敵箭侵陵御幄時君臣相顧不勝悲難平猶自惟天命
盧杞姦邪竟不知

憲宗

叛將連頭就典刑元和功業竟無成晚年誤信妖人術
禍自丹砂藥裏生

文宗

輦路青青春草多
凭高無語涕滂沱
禁中夜召詞臣語
受制家奴可奈何

梁太祖

天下人心共惡梁
祇應無奈虎狼彊
可憐千尺黃河水
投盡清流始滅唐

唐莊宗

十年征戰不辭勞
三矢功成意氣豪
自咤身為李天下

馬知禍起郭門高

晉高祖

玉帛和蕃辱已深
那堪割地侈戎心
關南指點烽烟裏
遺患綿綿直至今

漢高祖

石氏君臣盡播遷
晉陽兵起據中原
早知只有三年漢
何似捐軀報晉恩

周太祖

出鎮雄藩勢已危擁兵乘釁襲京師誰知一代生靈主
元是雕青郭雀兒

周世宗

高平決戰破劉旻北取三關速若神大業未成天命改
殿前點檢是真人

許由

肥遁箕山不可尋高名不朽到於今尚留昔日洗耳水
為洗世人爭競心

后稷

洪水橫流四海饑教民稼穡務三時後王欲識艱難業
讀取豳風七月詩

伊尹

窮居樂道自躬耕那肯要君用割烹湯后不加三聘禮
未應改志為蒼生

箕子

諫君不聽念君深被髮佯狂自鼓琴千古共傳箕子操

一時難悟狡童心

比干

諫君不聽盍亡身豈忍求生却害仁不向天庭剖心死
安知心異世間人

伯夷

避紂窮居北海濱歸來端為有仁人武王不聽車前諫
餓死西山志亦伸

太伯

太伯高風不可追
雁行接羽共南蜚
莫言斷髮便無用
猶有荆蠻慕義歸

太公

隱迹蟠溪七十餘
釣灘清淺鬢蕭疎
滿懷韜畧為香餌
只釣文王不釣魚

周公

明堂攝政朝羣后
四海流言孺子疑
何事召公猶不說
丹心惟有鬼神知

召公

鼠牙雀角豈能欺
召伯聰明聽不疑
南國政成公已去
甘棠長結後人思

齊桓公

諸侯九合霸圖成
晉宋江黃盡會盟
惟有召陵功最直
包茅不貢故來征

晉文公

逆旅栖栖十九年
五蛇夾負遂升天
却慙不及齊桓正

卿相由無管仲賢

宋襄公

小國爭盟禍莫逃託名仁義直徒勞殺人祭鬼寧非忍
猶自臨戎惜二毛

秦穆公

秦穆平生善用兵孟明三敗始功成後人不識兵家勢
異議紛從勝負生

楚莊王

周衰外國最跳梁
楚人春秋勢更强
能用一言存滅國
賢哉猶有一莊王

魯隱公

唐堯授舜由天命
太伯奔吳避聖人
魯隱效顰端可笑
遜桓不正自亡身

桓公

菟裘有意身將老
杜園無端轡已萌
篡魯由來因羽父
過齊爭奈遇彭生

莊公

先君出會不生還魯弱無由可報寃禰廟豈宜姜氏見
莊同何忍與讎婚

閔公

慶父哀姜產禍芽斷斷魯道可勝嗟武闡難起無人救
季子來歸未足嘉

僖公

僖公能繼伯禽風盛德揄揚魯頌中惟有春秋用王法

不輕一字曲褒公

文公

時無閏月那成年廟有先君豈上賢魯國從來秉周禮
文公何事獨無天

宣公

東門無道敢欺天過市良姜語可憐和氣致祥乖致異
如公自合大無年

成公

周室孤危若旅人諸侯誰復肯來臣成公不是朝天子
假道京師會伐秦

襄公

侯伯誰修二霸功大夫專政自襄公堂堂魯國車千乘
翻在三家掌握中

昭公

昭公失國寓乾侯方伯無人肯見憂如晉適齊徒取辱
祇緣不用子家謀

定公

春秋疆場事紛然齊魯干戈幾載連若使真儒長見用
來歸何止汶陽田

哀公

諸侯失政陪臣僭中國無君左衽專欲問哀公後來事
春秋書止獲麟年

鄭莊公

天地深恩詎可忘寤生忠孝兩俱亡身從何出翻囚母

國是誰封敢射王

齊襄公

諸兒惟薄可曾修敝筭詩也兩國羞何事春秋猶譁惡
祇緣能報祖宗讎

齊頃公

敵國行人詎可輕等閒戲笑禍胎成胥閭竟日知何語
回首齊郊已被兵

鄧祁侯

舅甥杯酒結綢繆豈忍陰懷盜賊謀不聽三臣言亦是
未須深罪鄧祁侯

晉獻公

齒髮衰殘志慮昏讒興婦口可心寒不知尤物能為禍
却為驪姬寢食安

楚靈王

章華臺就國疲徭徵會諸侯意氣驕楚衆已離猶不悟
近臣徒為頌祁招

楚懷王

懷王誤與虎狼親身死咸陽一旅人見說國人懷舊德
楚雖三戶亦亡秦

吳王夫差

西施未必解亡吳祇為讒臣害霸圖
早使夫差誅宰嚭不應麋鹿到姑蘇

越王勾踐

機會由來貴速投姑蘇事與會稽侔
謀臣不早麾兵進

嘗膽徒勞二十秋

潁考叔

衣冠肉食謾紛紛誰解杯羹感悟君
潁谷封人雖賤士却能純孝至今聞

石碣

人情誰忍棄天倫公獨能將義滅親
何惜一時誅賊子不妨千古作純臣

孔父

春秋死難止三人皆欲求仁未得仁節義可書惟孔父
勝如仇牧勝如荀

仇牧

春秋死難止三人皆欲求仁未得仁仇牧捐軀為君父
不如孔氏勝如荀

荀息

春秋死難止三人皆欲求仁未得仁荀息捐軀為私暱
也勝賊子與姦臣

祭仲

庶子雖賢寧奪嫡人臣惟聖可行權區區祭仲何為者
賣國容身豈足賢

管仲

小節區區豈足羞功名未顯分繫囚平生自有真知己
寧患桓公怨射鉤

大夫種

狩罷吳郊鳥兔空果烹獵犬廢良弓大夫自為知幾晚

豈是陶朱計不忠

范蠡

久與君王共苦辛功成身退肯逡巡
五湖渺渺烟波闊誰是扁舟第二人

李廣

李廣才名漢世稀孝文猶自未深知
輟殮長歎無顏牧翻惜將軍不遇時

隴右英豪真有種將軍才氣更無雙
功高不得封侯賞

祇為當時殺已降

婁師德

忤意由來勿校難誰能唾面自令乾
直須事過心平後方服婁公度量寬

狄仁傑

武火方炎李欲灰忠良何力可能回
斗南人有擎天手為向虞淵取日來

徐有功

獄興羅織陷忠良公亦幾遭虎口傷蹈死救人免死
論功何止漢于張

梅溪前集卷十

欽定四庫全書

梅溪前集卷十一

宋 王十朋 撰

賦

雙瀑賦

王子游簫峯之下訪鼻祖於仙籍駐杖屨於金溪觀雙瀑之千尺于時驟雨初歇飄風迅擊飛泉洶湧怒流湍激噴烟霧於蒼嵐吼蛟龍于大澤百川震而澎湃萬類

紛其辟易疑若傾崖轉壑變丘谷而為陵又類萬馬千
兵奏鼓輦而赴敵久之狂潦微殺巨流順適靈源復尋
於故道雙派交馳於絕脊勢偶殊而卒合路雖分而稍
迫玉筋垂兮拂輕寒長紳拖兮蘸深碧疑若鯨鯢鬪怒
兮力未決而方酣千鎔爭鋒兮光交騰而互射嗟天匠
之施巧兮作勝事於泉石顧一派之罕有兮豈雙流之
易得不見夫銀河落於半天兮破廬阜之山色梅雨飛
於石門兮散芝田之靈蹟潭千丈於石橋兮渺仙凡之

路隔龍雨湫於雁蕩兮分大小而異宅彼獨溜而孤飛
兮猶擅名於今昔況並峙而爭流兮作人間之連壁吾
欲窮千里之源兮問化工之始闢思漢使之不復見兮
悵靈槎之難覓獨終日而登臨兮寄吾懷於幽寂興雖
盡而忘歸兮猶待乎風清而月白於是目瞬飛流之末
耳洗寒潭之側思往事之微茫仰遺風而嘆息竈中烟
冷難尋入竹之人峯頂臺荒不見吹簫之客賦罷乃歌
而歸曰

雙瀑之水從何來靈源千尺高崔嵬飛流噴沫飄瓊瑰
空山落日鳴春雷有客來遊獨徘徊枕流漱石興悠哉
塵襟濯罷飄然回風清月白空簫臺

至樂齋賦

并引

予讀歐陽詩有至哉天下樂終日在書案之句因採其
語以名齋又從而賦之

予與客坐於書齋之內客仰而顧俯而笑曰子知天下
之樂乎散於事物之萬端會於窮達之兩途然皆有窮

馬吾言而子聽諸高車駟馬腰金曳組前者呵後者衛
士之得志於當時者之樂也然有時而厭焉前日朝廷
之士扁舟去而煙浪深也枕流漱石吟風嘯月採於山
緡於泉士之無求於世者之樂也然有時而改焉前日
山林之士總帳空而猿鶴驚也予曰子之言皆外物之
樂也樂故有窮烏知天下有所謂無窮之至樂哉一簞
食一瓢飲顏回之樂也宅一廛田一區揚雄之樂也是
固無心於軒冕亦不放志於山林得乎內而樂乎道也

吾今將心於一齋之內適意乎黃卷之中師顏回友揚
雄遊於斯息於斯天下之至樂也又烏得而能窮

歸去來賦

歸去來兮終日思歸今已歸嗟連歲之行役兮誤甘旨
之屢違身雖處於異鄉兮念長在於庭闈陟高岡而東
望兮悵白雲之孤飛食齏鹽而無味兮悟蝸角之真非
泛李卿之竹葉兮詠晨光之熹微辰未浹而到家兮指
青燈而扣扉粲慈顏之一笑兮紛稚子之牽衣雖吾歸

之不若人兮不能衣錦而乘肥吾將以此而易彼兮學
何蕃其庶幾

梅溪題名賦

并引

吾徒宋孝先李大鼎作梅溪庚午多士賦叙一堂八齋
六十人名字而鋪陳條列三百六十字之中言簡意
盡有足觀者陳元佐萬孝傑童侃又作梅溪多士賦通
前後八年間凡一百二十人而併列之文工而事益詳
予於是採二賦之餘意變聲律而古之先美後規效古

人勸諷之旨非敢以文戲也目曰梅溪題名賦

余闢館于梅溪兮歲甫及乎夢齡

余弟壽朋字夢齡書館之闢今八年矣故

借夢九齡以喻意

自淵獻而逮乎敦牂兮頃十朋而今百朋

某

名百朋予季弟昌齡名于癸亥秋闈館聚徒游從者十人至庚午歲通數之凡一百二十二人

齋敞八

而堂虛一兮咸與賢而與能

謝與賢簡之與能任之

余宗旦而罔

有一德兮

余宗旦仲阜賈稱一德

敢不希仲舒之明經

陳元佐希仲

幸

諸友能祖說之遜志兮

張祖說文孺鄭遜志時敏

又恪希顏回之服

膺

陳恪叔恭林次淵希顏

乃有汾晉五士

羅士龍漢臣連士表少美士龍漢臣連士表少

華季士宏宏老昔晉文漢唐羣英張次房漢英孫元齡唐英李杞亦字唐英

鄭國七子

張仲遠子歆周孝友子施孝顯子揚孝思子則濬子深王淳張載並子厚春秋有鄭七子

賦涼州三明

劉玄德明夫萬序明之余如晦明叟後漢有涼州三明

器成三足之

鼎

李大鼎鎮夫郤鼎叔鎮萬鼎鎮遠

才宜九佐之卿

萬澄清卿童偉俊卿侃文卿宋孝先

舜卿林湯臣商卿陳朝揆正卿施良臣名卿陳光朝臺卿林叔舉虞卿

有一瑞兮冲遠之

鶚

賈脩一瑞劉鶚冲遠

有千里兮圖南之鵬

周千里百駒謝鵬圖南

莫不端

武升堂

蔡端武威仲

敦詩趨庭

劉敦詩溫夫

如壁之瑩

余璧全之如芷

之馨

玉芷

如窾之茂

茂窾

如椿之靈

萬椿揚椿並字大年

如梗楠

之美

萬梗永年楠億年揚楠元幹

如松梓之青

萬松喬年林梓材叔

森乎如鉞

之可畏

劉鉞通達

轟乎如震之可驚

周震景東

皎乎如海嶠之吐

明月

蔣嶠景山

耿乎如長庚之輝衆星

李庚少白

昂昂乎如季梁

之梗槩

萬孝傑季梁陳昂仲昂

孜孜乎如伯玉之老成

潘孜元善劉闕伯玉

可居天任而澤遠

趙公倚天任揚寓澤遠

可為王佐而揚庭

王佐才仲

陳獻可揚庭

可起傳巖之築

劉傳岩叟

可同舜佐之登

謝皋羽舜佐

憲

一夔而樂作

連憲民式周次鳳一夔

炳伯虎而文興

賈炳作德夏伯虎用之

肇輝先之德業

陳肇德遠許輝先光甫

諧興祖之家聲

余諧孝仲姚紹宗興

祖汝文兮宜月選而季詮何鐸汝文汝弼兮必類進而

方升

陳舜咨汝弼方升中高

逝矣乎

王述正矣

有來二客業彼管城橫陽

許武子龍泉管叔奇來客梅溪以篆字題名

名列甲乙字篆丙丁

丙丁謂篆字也見爾

雅如翼斯飛

吳翼李南

如璘斯熒

王璘德大

燦銀鉤與玉筋儼壁

上之題名吾徒之秀乃有詞賦兮少雲之作

朱少雲吉作

太

原之老乃變聲律兮祖舜之賡

陳少虞祖舜

於是聞大猷而

溥告之曰

李大猷定夫孫溥德廣林溥叔廣

學必剖藩籬而克已

繆克已兼

夫道必舍蹊徑而中行

蔣中行謙仲

先之以孝忱之意

萬庚先之

曾來會課亦與題
名宋孝忱伯恂

申之以敦信之誠萬庠申之劉敦信信叟禮欲

安上兮必先自治

林安上世闕

仁欲及遠兮慎毋自矜林取仁及遠

湛萬頃以窺憲

黃萬頃伯厚葉頃澄叟

妙一唯之悟曾

鄒一唯仁叟祖

伊尹畎畝之樂

許祖伊次尹

振仲尼文教之鳴

陳之亂振仲

玩蒙

亨之爻象

李蒙亨彦通

俟泰來而彙征

萬康泰之

勿務世華而起

文通之附

夏伯文世華劉文通叔達唐陸淳謚文通先生柳子厚嘗欲掃其門然陸亦附王叔文者

勿求必達而貪季孫之榮

張必達邦彥劉祖漢季孫

窮則隱居

吳隱若靖

翁達斯大亨

徐大亨顯仲

凡百君子毋渝此盟

銘

止庵銘

叔父寶印講師築止庵以居姪某銘曰

學者求道如客在途不有所止將安歸乎大學之道在於知
止意誠心正乃悟斯理孔門高第回也獨賢未見其止夫子
惜焉庵中道人由儒入佛進於有為止於無物欲知止處是
亦難言非內非外亦非中間道人失笑汝言亦綺道本無進
亦何有止道無進止庵無成壞孰知此庵中含法界

甕庵銘

予目黃楊為甕庵因銘之曰

團團甕庵自天生植匪陶匪鎔匪塗匪飾百榦輪囷匪
非斧斤萬葉敷披覆以瑠璃天牖玲瓏透日含風我非
原憲物異名同濃陰酒綠春色盃深我非畢卓意自酣
沉孰云此庵人不可住我以意游形骸曷預孰云此庵
飛禽所巢此意彼形了不相殽孰云此庵風燥雨濕我
意潛住風雨莫及以形住庵如璽裏蠶苟得其趣何所

不堪此庵此意聊復爾耳孰非吾廬亦何必此

會趣堂燈銘

長檠高燃不照青編短檠自對不照同輩孰若此燈巍
標一堂與爾多士同分厥光無囊爾螢無燭爾雪清夜
紅紗滿堂明月凡我同志勉思六經趣與心會無孤此
燈

止堂情話室銘

南浦陳臺卿取大學之義以名堂採陶淵明之賦以名

室命梅溪王某銘之銘曰

金玉滿堂不以名堂彼外物兮非可常大學之道在於
知止子以銘堂端有旨止匪易知匪難知反求諸身非
遠而正子心兮誠子意定應不離方寸地

右止堂

情之所鍾正在我輩況於親戚又情之最親戚之話苟
不情將烏乎用其情獨不見夫陳子之入是室兮無話
不情非情不話顏津津兮常自快願子擴親戚之情意

均此話於踈外則四海之內皆兄弟其為悅也尤大

右情話堂

書几銘

是惟王子之几至哉之樂在乎是

厨銘

是惟王子之厨中藏吾書吾腹不如

書銘

是惟王子之書惟其不勤是以空虛

筆銘

是惟王子之筆爾心有盡時吾用無窮日

墨銘

是惟王子之墨予以稼穡客卿之德

紙銘

是惟王子之紙吾不善書慙爾多矣

硯銘

是惟王子之硯出入廣場兮經百戰

硯匣銘

啟焉斯磨蓋焉斯藏匣爾陶泓器吾文房

筆池銘

直方其形兮泓其中滌毛穎兮爾之功

簡板銘

斷之平如漆之明如札之盈如潔之瑩如毋枯剝藤惟
爾之書

粘板銘

千里面目曰書簡函而封之斯致遠代卓受垢而不辭
者是惟粘板

界方銘

心正筆正亦惟爾有以相其正

界筆銘

中書君老而禿棄之則可惜取其心之猶可用以小管
城為之宅吾欲寫盡天下書賴爾為之畫策

詩筒銘

我腹空虛兮好斐然而成章爾腹空洞兮宜為吾之錦囊

書筒銘

交將解散兮書不可已爾為魚鴈兮通面目於千里

鏡銘

是惟王子之鏡勿病乎面目可憎而取乎衣冠可正

燈銘

是惟王子之燈燒膏繼晷惟汝能

香爐銘

匪金匪玉銅姿瓦質以爾馨德在吾蘭室

印斗銘

器髴而光斗形而方孰鐫賤名於是乎藏

扇銘

無仁風兮可揚惟篋中兮是藏

肩輿銘

我僕既食我輿斯肩我將何之必故必親豈無公門經

歲弗入豈無權門足未嘗及肅爾徒御慎吾往還惟分之安肩輿斯安

菖蒲盂銘

叔父寶印講師之贈也銘以記之

伊巧匠兮斲山骨剗其中兮方其質擎湖嵌兮隱蘭若根玉衡兮灌天一從何來兮叔贈姪真清流兮宜在吾室

國朝名臣贊

寇萊公

嗚呼萊公相我真宗契丹南牧朝野洵洵羣臣勸帝幸
蜀江東微公決策天下興戎百年無兵繫誰之功

韓魏公

巍巍韓公文武兼資相我三宗身任安危周勃定策霍
光受遺古社稷臣公實有之非我仁祖其孰能知

范文正公

堂堂范公人中之龍正色立朝姦邪不容材兼文武躬

履仁義出將入相十纔一試真王佐才用之未至

富鄭公

巖巖富公仁者之勇危言折敵神色不恐公在使車敵不敢動公在相位四裔稽顙出入三朝為國輕重

杜祁公

維正獻公相我仁宗公在相位私謁不容苞苴不通非道不從封還內降與權倖抗公忠直亮清白宰相

歐陽文忠公

賢哉文忠直道大節知進知退既明且哲陸贄議論韓愈文章李杜歌詩公無不長當世大儒邦家之光

文潞公

太師潞公勲高業隆四朝元老福祿始終元祐之初太
后臨極起公於洛平章軍國荒裔來朝服公之德

趙清獻公

於維清獻典天之憲人呼鐵面發姦糾慝以正王國古
之遺直吳蜀父老語之流涕公之治民古之遺愛

司馬溫公

宋二百年名臣輩出孰為第一咸曰君實田夫野老識
其遺風至今猶語司馬相公以手加額涕泗亡從

蘇東坡

東坡文章百世之師羣邪所仇歛不及施萬里南遷而
氣不衰我讀公文慕其所為願為執鞭恨不同時

蘇頌濱

賢哉子由賢哉子由忠言嘉謀聳動冕旒橫身政府不

避怨仇棣萼聯芳皆第一流才不逮兄器識俱優

陳了翁

賢哉瑩中賢哉瑩中鶚立兩朝凜乎清風二蔡瞞凶飾
奸為忠黨與雷同牢不可攻公獨仇之折其姦鋒孤立
不容身以譴終公乎不忘名等岱崧

梅溪前集卷十一